

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA
Broj: 02-02-162/09
Sarajevo, 19.03.2009. godine

Z A P I S N I K
20. SJEDNICE DOMA NARODA PARLAMENTA FEDERACIJE BOSNE I
HERCEGOVINE, održane 05. februara 2009. godine i 19. marta 2009.
godine

Sjednica je počela u 10.30.

Sjednici je predsjedavao Stjepan Krešić, predsjedavajući Doma naroda Parlamenta Federacije BiH.

Na početku sjednice predsjedavajući je pozdravio delegate, premijera Vlade Federacije BiH Nedžada Brankovića, zamjenika premijera Gavрила Grahovca, ministre u Vladi Federacije BiH, predstavnike udruženja, sindikata, međunarodnih organizacija, goste i predstavnike akreditiranih medijskih kuća koji prate rad sjednice.

Izostanak sa sjednice opravdali su: Jasenko Tufekčić, Mira Jurić, Alija Begović i Dženana Zlatar.

Na osnovu evidencije Stručne službe, predsjedavajući je konstatovao da sjednici prisustvuje 45 delegata, što čini većinu, te Dom naroda može raditi i punovažno odlučivati.

Prije prelaska na rad delegati su, bez primjedbi, jednoglasno usvojili Zapisnik 18. sjednice, održane 27.12.2008. i 22.01.2009. godine i Zapisnik 19. sjednice Doma naroda Parlamenta Federacije BiH, održane 30.12.2008. godine.

Nakon toga predsjedavajući je podsjetio delegate da na osnovu člana 104. Poslovnika o radu Doma naroda mogu postavljati delegatska pitanja, pokretati inicijative ili izraziti nezadovoljstvo dobijenim odgovorima.

Delegatska pitanja i inicijative

Josip Perić izrazio je nezadovoljstvo odgovorom koji je dao direktor inspekcije u vezi sa Zakonom na osnovu kojeg je provedena "akcija inspekcijskog nadzora", te je ponovio pitanje i premijeru Federacije i federalnom ministru finansija prema kojem Zakonu je provedena akcija i da li je taj zakon proglašen neustavnim od Ustavnog suda Federacije BiH.

Premijer Nedžad Branković obećao je da će se angažovati da se što prije dostavi odgovor na postavljeno pitanje, uz obrazloženje da nije cijeli Zakon proglašen neustavnim, već dio Zakona.

Elvira Abdić-Jelenović izrazila je nezadovoljstvo zbog nedobijanja transkripata sa sjednica Predsjedništva BiH i Skupštine BiH u perioda od 1992. do 1994. godine pozivajući se na član 11. Zakona o slobodi pristupa informacijama u Federaciji BiH, te je državnom Arhivu uputila požurnicu i zatražila hitno izjašnjavanje zašto se nije odgovorilo u propisanom roku na njen zahtjev.

Postavila je pitanje kakva je suradnja između Federalnog ministarstva energetike, industrije i rudarstva sa kantonalnim ministarstvima nadležnim u ovoj oblasti, koliki je iznos novčanih kazni naplaćenih od privrednih društava, pravnih i fizičkih lica na ime nelegalne eksploatacije mineralnih sirovina i koje su objektivne prepreke za zakonsko regulisanje ove oblasti.

Drago Puzigaća uputio je pitanje ministru poljoprivrede, vodoprivrede i šumarstva na osnovu kojih kriterija je vršen poticaj vezan uz poljoprivredno stočarstvo i voćarstvo i zatražio pisani odgovor.

Ministar poljoprivrede, vodoprivrede i šumarstva Damir Ljubić rekao je da je prilikom usvajanja Zakona o novčanim poticajima pozvao delegate i zastupnike da Ministarstvu prijave bilo kakve malverzacije u vezi sa korištenjem poticaja. Također je izjavio da je Program poticaja sa imenima osoba koja su dobila poticaje dostavljen Federalnoj upravi za inspekcijske poslove koja je dužna prekontrolisati imena.

Drago Puzigaća izjavio je da je posao Federalnog ministarstva poljoprivrede, vodoprivrede i šumarstva da istraži malverzacije i utvrdi da li su neke osobe dobile poticaj koje se ne bave poljoprivrednim stočarstvom i zatražio da mu se dostave informacije o poticajima koji su usmjereni u općine Drvar, Glamoč, Grahovo i druge općine u Kantonu 10-Livno.

Ministar Damir Ljubić je izjavio da će dostaviti pisani odgovor i napomenuo da će svi oni koji su nenamjenski koristili poticaje biti krivično gonjeni.

Ivo Komšić je postavio dva pitanja.

Prvo pitanje traži odgovor kada će Kolegij predložiti Domu naroda da se održi tematska sjednica na kojoj će se obaviti rasprava o stanju u privredi u Federaciji BiH.

Drugo pitanje upućeno je Vladi Federacije a odnosi se na prekid radova na autoputu Sarajevo-Zenica dionica kraj Čatića, te zatražio da se označi da je ovo radilište napušteno kako bi se osigurao normalan promet.

Ramo Isak kritikovao je ministre uz molbu da ne drže predavanja delegatima, s obzirom na to da su ministri predstavnici izvršne vlasti i oni su odgovorni za provedbu zakona.

Postavio je pitanje da li je nezakonito primiti radnike bez objavljenog javnog konkursa kao što je to učinio direktor Javnog poduzeća Rudnika mrkog uglja u Zenici. Pitanje je dostavio u pisanoj formi.

Kenan Keserović postavio je dva pitanja.

Prvo pitanje upućeno je Federalnom ministarstvu zdravstva a odnosi se na izradu dokumenta "Mladi i zdravlje" i tražio da mu se uz prilog pisanog odgovora dostavi ovaj dokument ili polazni osnov na kojem je rađen dokument.

Drugo pitanje postavio je Federalnom ministarstvu rada i socijalne politike a odnosi se na izradu Strategije za prevenciju nasilja u porodici sa Akcijonim planom Federacije BiH te upitao koje su institucije i organizacije upućene u izradu Strategije. Zatražio je da se uz obrazloženje pisanog odgovora priloži Strategija i naziv organizacija i institucija koje su učestvovala u izradi Strategije.

Muhamed Osmić pokrenuo je jednu inicijativu i postavio pitanje.

Inicijativa se odnosi na donošenje izmjena i dopuna Zakona o finansijskoj konsolidaciji "JP Željeznice FBiH" d.o.o. po hitnom postupku.

Također je upitao da li je moguće da Porezna uprava odnosno Federalno ministarstvo finansija zasnuje hipoteku na općinskom zemljištu koje je izvan prometa.

Mislav Sučić pokrenuo je inicijativu prema Federalnom ministarstvu prometa i komunikacija kojom traži da cesta Livno – Prolog – Maglaj - Sinj dobije status magistralne ceste.

Miro Lazović pokrenuo je inicijativu Kolegiju Doma naroda kojom traži održavanje zajedničke sjednice Predstavničkog doma i Doma naroda Parlamenta Federacije BiH na kojoj bi se raspravljalo o problemima funkcioniranja Radio-televizijskog sektora u Federaciji BiH i Bosni i Hercegovini.

Mladen Lonić postavio je dva pitanja Federalnom ministarstvu poljoprivrede, vodoprivrede i šumarstva.

Prvo pitanje odnosi se na veće poticanje investicija nego proizvodnje u poljoprivredi.

Drugo pitanje se odnosi na donošenje zakona u stočarstvu.

Zoran Budimić pokrenuo je inicijativu da Federalno ministarstvo poljoprivrede, vodoprivrede i šumarstva, podzakonsim aktom riješi problem rada poljoprivrednih apoteka, odnosno rada za pultom u tim apotekama.

Potom je postavio pitanje Federalnom ministarstvu poljoprivrede, vodoprivrede i šumarstva i Federalnom ministarstvu finansija u vezi sa isplaćenim poticajima u poljoprivredi do kraja 2008. godine, roka do kojeg bi se trebali isplatiti preostali poticaji, te zašto neisplaćeni poticaji do sada nisu isplaćeni.

Edin Hozan postavio je pitanje Vladi Federacije kada će se Bošnjacima, Srbima i ostalim građanima povratnicima u Jajce omogućiti ravnopravan tretman prilikom zapošljavanja u JP Elektroprivreda "HZ-HB", JP "Hrvatski Telekom" i JP "Hrvatske pošte".

Besim Imamović postavio je tri pitanja.

Prvo pitanje postavio je Federalnoj direkciji cesta i Federalnom ministarstvu prometa i komunikacija a odnosi se na uklanjanje objekata u putnom pojasu čime bi se povećala sigurnost prometa, te da li je planom za ovu godinu predviđena izgradnja pomoćnih staza za pješake na potezu Kladanj-Živinice.

Drugo pitanje postavio je Federalnom ministarstvu poljoprivrede, vodoprivrede i šumarstva, a odnosi se na dostavljanje u parlamentarnu proceduru Zakona o šumama.

Treće pitanje postavljeno je Federalnom ministarstvu turizma i okoliša a tiče se dostavljanja Zakona o poticaju zaštite okoliša.

Lidija Bradara postavila je tri pitanja.

Prvo pitanje uputila je Vladi Federacije a odnosi se na izbor menadžmenta Fonda za okoliš.

Drugo pitanje odnosi se na dostavljanje informacije o stanju u "Krivaji".

Treće pitanje odnosi se na nacionalnu strukturu zaposlenih u BH Telecomu i u svim općinama u Kantonu Središnja Bosna.

Tomo Vidović uputio je pitanje Federalnom ministarstvu rada i socijalne politike i Federalnom ministarstvu za pitanje branitelja i invalida odbrambeno-oslobodilačkog rata koje se odnosi na to koji je organ i na osnovu koje zakonske odredbe te da li je data suglasnost na Odluku kojom je regulisano da Institut za medicinsko vještačenje zdravstvenog stanja

naplaćuje postupak ocjene radne, odnosno zdravstvene sposobnosti ratnih vojnih invalida, civilnih žrtava rata i neratnih invalida.

Radoje Vidović postavio je pitanje Vladi Federacije što će poduzeti prema menadžmentu Elektroprivrede BiH koji nije ispoštovao Odluku Vlade Federacije i Odluku FERK-a o otvaranju elektroenergetske bilance u Federaciji BiH.

Josip Perić uputio je dva pitanja federalnom ministru finansija.

Prvo pitanje vezano je uz premještanje poreznog ureda Kantona 10 u Livno u privatni objekt za koji se plaća zakupnina.

Drugo pitanje odnosi se na trajanje mandata direktora Porezne uprave i na reizbor aktuelnog direktora.

Sead Čaušević postavio je pitanje premijeru Federacije u vezi sa povezivanjem staža za 48 hiljada radnika i upitao na temelju kojeg zakona je to urađeno.

Premijer Nedžad Branković odgovorio je da su korištena rješenja iz Zakona o obračunatim a neuplaćenim javnim prihodima.

Ivo Tadić postavio je pitanje premijeru Federacije u vezi sa stanjem u kome se nalazi Dom zdravlja sa stacionarom u Žepču.

Nakon postavljenih delegatskih pitanja i inicijativa prešlo se na utvrđivanje dnevnog reda.

Vlada Federacije dostavila je Prijedlog Zakona o izmjenama i dopunama Zakona o državljanstvu Federacije BiH sa prijedlogom da se razmatra po hitnom postupku.

Igor Rajner upitao je zašto se Prijedlog Zakona sada stavlja na dnevni red sa prijedlogom da se razmatra po hitnom postupku, obzirom na to da je Prijedlog Zakona dostavljen Parlamentu Federacije prije tri mjeseca.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH, sa 34 glasa za, uz jedan glas protiv i uz tri uzdržana glasa, prihvatio da se Prijedlog Zakona o izmjenama i dopunama Zakona o državljanstvu Federacije BiH razmatra po hitnom postupku.

Senad Kananović, delegat u Domu naroda, podnio je Prijedlog Zakona o izmjeni Zakona o sudovima u Federaciji BiH sa prijedlogom da se razmatra po skraćenom postupku.

Senad Kananović postavio je pitanje da li je mišljenje Visokog sudskog i tužilačkog vijeća Bosne i Hercegovine, koje bi trebalo dati na ovaj Prijedlog Zakona obvezujuće.

Predsjedavajući je obavjestio delegate da je prijedlog Kolegija Doma naroda da Prijedlog Zakona ostane na dnevnom redu, ali bi se trebao usvojiti zaključak kojim bi se ostavio rok od dva mjeseca u kojem bi se Vlada Federacije trebala izjasniti o Prijedlogu Zakona. Također je izjavio da mišljenje Visokog sudskog i tužilačkog vijeća Bosne i Hercegovine nije obvezujuće, ali će se i Vijeću ostaviti rok od dva mjeseca da dostavi svoje mišljenje.

U vezi s tim u raspravi su učestvovali Besim Imamović i Fahrudin Skopljak i predložili da se Zakon razmatra u formi nacrtu Zakona a da onda resorno ministarstvo preuzme ovaj zakon kao svoj na osnovu kojeg bi napravilo cjelovite izmjene Prijedloga Zakona.

Dom naroda je prihvatio da se Zakon razmatra u formi nacrtu Zakona.

Predsjedavajući je obavjestio delegate da je premijer Federacije predložio da se u dnevni red sjednice uvrsti Prijedlog Zakona o izmjenama i dopunama Zakona o osnovama socijalne zaštite, zaštite civilnih žrtava rata i zaštite porodice sa djecom sa prijedlogom da se razmatra po hitnom postupku.

Igor Rajner izjavio je da bi se Prijedlog Zakona trebao razmatrati u redovnoj proceduri jer se, prema njegovom mišljenju, radi o složenom zakonu.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH sa 35 glasa za uz tri glasa protiv i uz jedan uzdržani glas, prihvatio da se Prijedlog Zakona o izmjenama i dopunama Zakona o osnovama socijalne zaštite, zaštite civilnih žrtava rata i zaštite porodice sa djecom razmatra po hitnom postupku.

Predsjedavajući je također obavijestio delegate da je Zajednička komisija za usuglašavanje različito usvojenih tekstova u oba doma Parlamenta Federacije BiH dostavila prijedlog za rješenje spornih pitanja u Prijedlogu Zakona o pomilovanju. Prijedlog Komisije je da Predstavnički dom odustane od dva amandmana koja je izglasao, tj. da Zakon usvoji u tekstu kako ga je usvojio Dom naroda.

Federalni ministar turizma i okoliša Nevenko Herceg zamolio je delegate da se Prijedlog Zakona o ugostiteljskoj djelatnosti i Prijedlog Zakona o turističkoj djelatnosti razmatraju na kraju dnevnog reda jer je potrebno izvršiti usuglašavanje sa Federalnom upravom za inspeksijske poslove. Ovaj prijedlog su delegati prihvatili.

Nakon toga predsjedavajući je predložio da se prvo obavi rasprava o svim tačkama dnevnog reda, a da se izjašnjavanje obavi na kraju, što su delegati prihvatili.

Potom se prešlo na glasanje o dnevnom redu.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH, sa 38 glasova za, uz dva glasa protiv i uz jedan uzdržani glas, usvojio sljedeći:

D N E V N I R E D

1. Prijedlog Zakona o izmjenama i dopunama Zakona o osnovama socijalne zaštite, zaštite civilnih žrtava rata i zaštite porodice sa djecom – hitni postupak;
2. Prijedlog Zakona o izmjenama i dopunama Zakona o poticanju razvoja male privrede;
3. Prijedlog Zakona o izmjenama i dopunama Zakona o državljanstvu Federacije BiH – hitni postupak;
4. Nacrt Zakona o izmjeni Zakona o sudovima u Federaciji BiH (predlagač: Senad Kananović, delegat u Domu naroda);
5. Prijedlog Zakona o obrtu i sličnim djelatnostima;
6. Nacrt Zakona o poljoprivrednim savjetodavnim službama;
7. a) Prijedlog Odluke o utvrđivanju osnovnog paketa zdravstvenih prava,
b) Prijedlog Odluke o maksimalnim iznosima neposrednog učestvovanja osiguranih osoba u troškovima korištenja pojedinih vidova zdravstvene zaštite u osnovnom paketu zdravstvenih prava;
8. Prijedlog Strateškog plana i programa razvoja energetskog sektora Federacije BiH;
9. Nacrt Strategije zaštite okoliša Federacije BiH;
10. Prijedlog Odluke o izmjenama i dopunama Statuta Zavoda za transfuzijsku medicinu Federacije BiH;
11. Izvještaj o poslovanju JP “Željeznice Federacije BiH” d.o.o. Sarajevo za 2007. godinu;
12. Prijedlog Zakona o ugostiteljskoj djelatnosti;
13. Prijedlog Zakona o turističkoj djelatnosti;
14. Izbori i imenovanja.

1. Prijedlog Zakona o izmjenama i dopunama Zakona o osnovama socijalne zaštite, zaštite civilnih žrtava rata i zaštite porodice sa djecom

Prijedlog Zakona utvrdila je Vlada Federacije.

Prijedlog Zakona obrazložili su premijer Nedžad Branković i Perica Jelečević, federalni ministar rada i socijalne politike.

U raspravi su učestvovali: Elvira Abdić-Jelenović, premijer Nedžad Branković, Tomo Vidović, Igor Rajner, predsjednica Kluba delegata srpskog naroda Mira Ljubijankić, Kenan Keserović, Lidija Bradara i Perica Jelečević, federalni ministar rada i socijalne politike, koji je ispred Vlade Federacije podnio amandman na Prijedlog Zakona.

Amandman

Čl. 8., 9. i 10. Prijedloga Zakona se brišu.

Domu naroda obratili su se Zijad Arapčić, predstavnik civilnih žrtava rata, i Fikret Zuko, predsjednik Saveza slijepih Federacije BiH.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH, sa 39 glasova za, uz jedan glas protiv i uz šest uzdržanih glasova, usvojio Prijedlog Zakona o izmjenama i dopunama Zakona o osnovama socijalne zaštite, zaštite civilnih žrtava rata i zaštite porodice sa djecom.

2. Prijedlog Zakona o izmjenama i dopunama Zakona o poticanju razvoja male privrede

Prijedlog Zakona utvrdila je Vlada Federacije.

Predstavnički dom je na nastavku 17. sjednice od 29.10.2008. godine usvojio Prijedlog Zakona u tekstu kako ga je predložila Vlada Federacije.

Prijedlog Zakona razmatrala su nadležna radna tijela i dostavila svoje izvještaje.

Na Prijedlog Zakona Kenan Keserović podnio je dva amandmana koji se odnose na član 1. stav 2. i dodavanje novog stava 3. u članu 1.

Prijedlog Zakona obrazložio je Velimir Kunić, federalni ministar razvoja, poduzetništva i obrta, i izjavio da ne prihvata amandmane Kenana Keserovića.

U raspravi su učestvovali: Kenan Keserović i Velimir Kunić, federalni ministar razvoja, poduzetništva i obrta.

3. Prijedlog Zakona o izmjenama i dopunama Zakona o državljanstvu Federacije BiH

Prijedlog Zakona utvrdila je Vlada Federacije.

Predstavnički dom je na nastavku 17. sjednice od 29.10.2008. godine usvojio Prijedlog Zakona u tekstu kako ga je predložila Vlada Federacije.

Prijedlog Zakona razmatrala su nadležna radna tijela i dostavila izvještaje.

Prijedlog Zakona obrazložio Muhidin Alić, federalni ministar unutrašnjih poslova.

U raspravi su učestvovali: predsjednik Kluba delegata hrvatskog naroda Josip Perić, Miro Lazović, Besim Imamović, Igor Rajner, Muharem Serbezovski i federalni ministar unutrašnjih poslova Muhidin Alić.

4. Nacrt Zakona o izmjeni Zakona o sudovima u Federaciji BiH

Zakon je u formi prijedloga predložio Senad Kananović, delegat u Domu naroda.

Predsjedavajući je podsjetio delegate da je predlagač u prethodnom postupku prihvatio da se Zakon razmatra u formi nacrt.

Zakon su u formi prijedloga razmatrala nadležna radna tijela i dostavila izvještaje.

Zakon je obrazložio Senad Kananović.

Na Prijedlog Zakona dva amandmana podnio je Klub delegata hrvatskog naroda. Amandmani će se, s obzirom na to da se Zakon razmatrao u formi nacrt, razmatrat kao prijedlozi, primjedbe i sugestije na Nacrt Zakona.

U raspravi su učestvovali: Besim Imamović, Drago Puzigaća, predsjednik Kluba delegata hrvatskog naroda Josip Perić, Fahrudin Skopljak i Muhamed Osmić.

5. Prijedlog Zakona o obrtu i sličnim djelatnostima

Prijedlog Zakona utvrdila je Vlada Federacije.

Predstavnički dom je na nastavku 18. sjednice od 13.01.2009. godine usvojio Prijedlog Zakona sa dva amandmana Vlade Federacije koji su postali sastavni dio Prijedloga Zakona. Amandmani se odnose na čl. 9 i 11.

Prijedlog Zakona razmatrala su nadležna radna tijela i dostavila izvještaje.

Prijedlog Zakona obrazložio je Velimir Kunić, federalni ministar razvoja, poduzetništva i obrta.

U raspravi su učestvovali: Kenan Keserović i Velimir Kunić, federalni ministar razvoja, poduzetništva i obrta.

6. Nacrt Zakona o poljoprivrednim savjetodavnim službama

Nacrt Zakona utvrdila je Vlada Federacije.

Predstavnički dom je na 17. sjednici od 17.11.2008. godine razmatrao Nacrt Zakona i Zaključkom ga prihvatio.

Nacrt Zakona razmatrala su nadležna radna tijela i dostavila svoje izvještaje.

Nacrt Zakona obrazložio je Nijaz Brković, pomoćnik federalnog ministra poljoprivrede, vodoprivrede i šumarstva.

Prije prelaska na raspravu Zoran Budimić, predsjednik Odbora za poljoprivredu, vodoprivredu i šumarstvo, pročitao je Zaključke koje je predložio Odbor.

U raspravi su učestvovali: Elvira Abdić-Jelenović, Nikola Simić, Zijad Tvica, Muhamed Osmić i Igor Rajner.

7. a) Prijedlog Odluke o utvrđivanju osnovnog paketa zdravstvenih prava

Prijedlog Odluke utvrdila je Vlada Federacije i dostavila je Parlamentu Federacije radi razmatranja i donošenja.

Predstavnički dom je na nastavku 17. sjednice od 18.11.2008. godine donio Odluku uz dva amandmana, koje je Vlada Federacije prihvatila pa su postali sastavni dio Prijedloga Odluke. Amandmani se odnose na tačku IX. stav 2.; tačka 2.c i tačku IX. stav 2. tačka 2. iza f dodati g.

Prijedlog Odluke su razmatrala nadležna radna tijela i dostavila izvještaje.

b) Prijedlog Odluke o maksimalnim iznosima neposrednog učešća osiguranih osoba u troškovima korištenja pojedinih vidova zdravstvene zaštite u osnovnom paketu zdravstvenih prava

Prijedlog Odluke utvrdila je Vlada Federacije i dostavila je Parlamentu Federacije radi razmatranja i donošenja.

Predstavnički dom je na nastavku 17. sjednice od 18.11.2008. godine donio Odluku uz Amandman koji je Vlada Federacije prihvatila, pa je postao sastavni dio Prijedloga Odluke. Amandman se odnosi na tačku V.

Prijedlog Odluke razmatrala su nadležna radna tijela i dostavila izvještaje.

Prijedloge ovih odluka obrazložio Safet Omerović, federalni ministar zdravstva.

U zajedničkoj raspravi o odlukama sudjelovali su: Zijad Tvica, Safet Omerović, federalni ministar zdravstva, Snježana Milavić, Dragomir Bilić, Mira Ljubijankić, Muhamed Osmić, Zoran Budimić, Tomo Vidović, Emir Frašto, Svetozar Pudarić, Josip Perić i Igor Rajner.

8. Prijedlog Strateškog plana i programa razvoja energetskog sektora Federacije BiH

Prijedlog Strateškog plana utvrdila je Vlada Federacije i dostavila Parlamentu Federacije radi razmatranja i usvajanja.

Predstavnički dom je, na nastavku 18. sjednice od 13.01.2009. godine usvojio Prijedlog Strateškog plana i programa razvoja energetskog sektora Federacije BiH uz Zaključke Odbora za energetiku, rudarstvo i industriju.

Prijedlog Plana razmatrala su nadležna radna tijela i dostavila izvještaje.

Prijedlog Plana obrazlagao je predstavnik Vlade Federacije BiH, ali iz tehničkih razloga izlaganje nije mogao završiti.

Nakon toga predsjedavajući je predložio da se nastavak obrazlaganja i rasprava obave na nastavku sjednice i potom prekinuo sjednicu.

Sjednica je prekinuta u 17.17.

NASTAVAK SJEDNICE OD 19. marta 2009. godine

Sjednica je počela u 10.25.

Sjednici je predsjedavao Stjepan Krešić, predsjedavajući Doma naroda Parlamenta Federacije BiH.

Na početku sjednice predsjedavajući je pozdravio delegate, premijera Vlade Federacije BiH Nedžada Brankovića, ministre u Vladi Federacije BiH, predstavnike udruženja, sindikata, međunarodnih organizacija, goste i predstavnike akreditiranih medijskih kuća koji prate rad sjednice.

Izostanak sa sjednice opravdali su: Jasenko Tufekčić, Mira Ljubijankić, Saša Magazinović, Kenan Keserović, Igor Rajner, Elvira Abdić-Jelenović i Zijad Tvica.

Na osnovu evidencije Stručne službe, predsjedavajući je konstatovao da sjednici prisustvuju 42 delegata, što čini većinu, te Dom naroda može raditi i punovažno odlučivati.

Prije prelaska na rad predsjedavajući je podsjetio delegate na preostale tačke dnevnog reda i prešao na rad.

2. Prijedlog Zakona o izmjenama i dopunama Zakona o poticanju razvoja male privrede

Predsjedavajući je podsjetio delegate da je Predstavnički dom na nastavku 17. sjednice od 29.10.2008. godine usvojio Prijedlog Zakona u tekstu kako ga je predložila Vlada Federacije.

Također je podsjetio delegate da je rasprava o Prijedlogu Zakona zaključena i da je na ovaj Zakon Kenan Keserović podnio dva amandmana koji se odnose na član 1. stav 2. i dodavanje novog stava 3. u članu 1. koje

Vlada Federacije nije prihvatila. Nakon toga predsjedavajući je dao na glasanje ova dva amandmana jer Kenan Keserović nije odustao od njih.

Na osnovu rezultata glasanja predsjedavajući je konstatovao da Dom naroda nije usvojio amandmane jer je za glasovalo 13 delegata, a 30 delegata je bilo uzdržano.

Potom se prešlo na glasanje o Prijedlogu Zakona.

Na osnovu rezultata glasanja, predsjedavajući je konstatovao da je Dom naroda jednoglasno, sa 43 glasa, usvojio Prijedlog Zakona o izmjenama i dopunama Zakona o poticanju razvoja male privrede.

3. Prijedlog Zakona o izmjenama i dopunama Zakona o državljanstvu Federacije BiH

Predsjedavajući je podsjetio delegate da je Predstavnički dom na nastavku 17. sjednice od 29.10.2008. godine usvojio Prijedlog Zakona u tekstu kako ga je predložila Vlada Federacije.

Također je podsjetio delegate da je rasprava o Prijedlogu Zakona zaključena i da je potrebno da se Dom naroda izjasni o ovome.

Na osnovu rezultata glasanja, predsjedavajući je konstatovao da je Dom naroda, sa 30 glasova za, uz deset glasova protiv i uz dva uzdržana glasa, usvojio Prijedlog Zakona o izmjenama i dopunama Zakona o državljanstvu Federacije BiH.

4. Nacrt Zakona o izmjeni Zakona o sudovima u Federaciji BiH

Predsjedavajući je podsjetio delegate da je Zakon predložio Senad Kananović, delegat u Domu naroda, na koji je dva amandmana podnio Klub delegata hrvatskog naroda. S obzirom na to da je Zakon razmatran u formi nacrta amandmani će se smatrati kao prijedlozi, primjedbe i sugestije na Nacrt Zakona.

Također je podsjetio delegate da je rasprava o Nacrtu Zakona zaključena i da je potrebno da se Dom naroda izjasni o tome.

Na osnovu rezultata glasanja, predsjedavajući je konstatovao da je Dom naroda, sa 39 glasova za i uz četiri uzdržana glasa, usvojio sljedeći:

ZAKLJUČAK

1. Dom naroda Parlamenta Federacije BiH prihvata Nacrt Zakona o sudovima u Federaciji BiH i smatra da može poslužiti kao osnov za izradu prijedloga Zakona.
2. Zadužuje se Vlada Federacije BiH, odnosno resorno ministarstvo da u saradnji sa nadležnom komisijom Doma naroda u roku od 60 dana pripremi prijedlog Zakona imajući u vidu prijedloge, primjedbe i sugestije iznesene na sjednici.

5. Prijedlog Zakona o obrtu i srodnim djelatnostima

Predsjedavajući je podsjetio delegate da je Predstavnički dom na nastavku 18. sjednice od 13.01.2009. godine usvojio Prijedlog Zakona sa dva amandmana Vlade Federacije koji su postali sastavni dio Prijedloga Zakona. Amandmani se odnose na čl. 9. i 11.

Također je podsjetio delegate da je rasprava o Prijedlogu Zakona zaključena i da je potrebno da se Dom naroda izjasni o Prijedlogu Zakona.

Na osnovu rezultata glasanja, predsjedavajući je konstatovao da je Dom naroda jednoglasno, sa 43 glasa, usvojio Prijedlog Zakona o obrtu i srodnim djelatnostima.

6. Nacrt Zakona o poljoprivrednim savjetodavnim službama

Predsjedavajući je podsjetio delegate da je Predstavnički dom na 17. sjednici od 18.11.2008. godine razmatrao Nacrt Zakona i Zaključkom ga prihvatio.

Također je podsjetio delegate da je rasprava o Nacrtu Zakona zaključena i da je potrebno da se Dom naroda izjasni o Nacrtu Zakona.

Na osnovu rezultata glasanja, predsjedavajući je konstatovao da je Dom naroda, sa 42 glasa za i uz jedan uzdržani glas, usvojio sljedeći:

ZAKLJUČAK

1. Dom naroda Parlamenta Federacije BiH prihvata Nacrt Zakona o poljoprivrednim savjetodavnim službama i smatra da može poslužiti kao osnov za izradu prijedloga Zakona.
2. Zadužuje se Vlada Federacije BiH da prilikom izrade prijedloga Zakona ima u vidu prijedloge, primjedbe i sugestije iznesene na sjednici.

- 7. a) Prijedlog Odluke o utvrđivanju osnovnog paketa zdravstvenih prava**
b) Prijedlog Odluke o maksimalnim iznosima neposrednog učestvovanja osiguranih lica u troškovima korištenja pojedinih vidova zdravstvene zaštite u osnovnom paketu zdravstvenih prava

- a) Prijedlog Odluke o utvrđivanju osnovnog paketa zdravstvenih prava

Predsjedavajući je podsjetio delegate da je Predstavnički dom na nastavku 17. sjednice od 18.11.2008. godine donio Odluku uz dva amandmana koje je Vlada Federacije prihvatila pa su postali sastavni dio Prijedloga Odluke. Amandman I. odnosi se na tačku IX. stav 2 i na tačku 2.c, a Amandman II. na dodavanje tačke g. iza tačke f. u stavu 2. tačka 2. Prijedloga Odluke.

Također je podsjetio delegate da je rasprava o Prijedlogu Odluke zaključena, te je Prijedlog Odluke dao na glasanje.

Na osnovu rezultata glasanja, predsjedavajući je konstatovao da je Dom naroda, sa 42 glasa za i uz jedan uzdržani glas, donio Odluku o utvrđivanju osnovnog paketa zdravstvenih prava.

- b) Prijedlog Odluke o maksimalnim iznosima neposrednog učestvovanja osiguranih lica u troškovima korištenja pojedinih vidova zdravstvene zaštite u osnovnom paketu zdravstvenih prava

Predsjedavajući je podsjetio delegate da je Predstavnički dom na nastavku 17. sjednice od 18.11.2008. godine donio Odluku uz amandman koji je Vlada Federacije prihvatila pa je postao sastavni dio Prijedloga Odluke. Amandman se odnosi na tačku V.

Također je podsjetio da je rasprava o Prijedlogu Odluke zaključena te je Prijedlog Odluke dao na glasanje.

Na osnovu rezultata glasanja, predsjedavajući je konstatovao da je Dom naroda, sa 41 glasom za i uz tri uzdržana glasa, donio Odluku o maksimalnim iznosima neposrednog učestvovanja osiguranih lica u troškovima korištenja pojedinih vidova zdravstvene zaštite u osnovnom paketu zdravstvenih prava.

8. Prijedlog Strateškog plana i programa razvoja energetskog sektora Federacije BiH

Prijedlog Zakona utvrdila je Vlada Federacije.

Predstavnički dom je na nastavku 18. sjednice od 13.01.2009. godine usvojio Prijedlog Strateškog plana i programa razvoja energetskog sektora Federacije BiH uz zaključke koje je predložio Odbor za energetiku, rudarstvo i industriju Predstavničkog doma.

Predsjedavajući je otvorio raspravu o ovoj tački.

U raspravi niko nije učestvovao.

Na osnovu rezultata glasanja, predsjedavajući je konstatovao da je Dom naroda, sa 35 glasova za i uz tri uzdržana glasa, usvojio Prijedlog Strateškog plana i programa razvoja energetskog sektora Federacije BiH, uz Zaključke Odbora za energetiku, rudarstvo i industriju Predstavničkog doma.

Nakon toga federalni ministar energije, rudarstva i industrije Vahid Hećo zahvalio je delegatima na usvajanju Strateškog plana.

9. Nacrt Strategije zaštite okoliša Federacije BiH

Nacrt Strategije utvrdila je Vlada Federacije.

Predstavnički dom je na nastavku 18. sjednice, održane 13.01.2009. godine, razmatrao Nacrt Strategije i Zaključkom ga prihvatio.

Nacrt Strategije razmatrala su nadležna radna tijela i dostavila svoje izvještaje.

Nacrt Strategije obrazložio je Nevenko Herceg, federalni ministar okoliša i turizma.

U raspravi su učestvovali Besim Imamović i Nevenko Herceg, federalni ministar okoliša i turizma.

Na osnovu rezultata glasanja, predsjedavajući je konstatovao da je Dom naroda jednoglasno, sa 41 glasom, prihvatio Nacrt Strategije zaštite okoliša Federacije BiH.

10. Prijedlog Odluke o izmjenama i dopunama Statuta Zavoda za transfuzijsku medicinu Federacije BiH

Zavod za transfuzijsku medicinu Federacije BiH dostavio je Vladi Federacije Statut o izmjenama i dopunama Statuta Zavoda za transfuzijsku medicinu. Budući da se Statut mijenja Odlukom, potrebno je da Dom naroda donese odluku o davanju saglasnosti o izmjenama i dopunama Statuta.

Vlada Federacije prihvatila je izmjene i dopune Statuta i dostavila ih Parlamentu Federacije radi davanja saglasnosti.

Predstavnički dom je na nastavku 17. sjednice, održane 18.11.2008. godine, donio Odluku o davanju saglasnosti na Odluku o izmjenama i dopunama Statuta Zavoda za transfuzijsku medicinu Federacije BiH.

Odluku su razmatrala nadležna radna tijela i dostavila izvještaje.

U raspravi niko nije učestvovao.

Na osnovu rezultata glasanja, predsjedavajući je konstatovao da je Dom naroda, sa 35 glasova za, uz pet glasova protiv i uz dva uzdržana glasa, donio Odluku o davanju saglasnosti na Odluku o izmjenama i dopunama Statuta Zavoda za transfuzijsku medicinu Federacije BiH.

11. Izvještaj o poslovanju JP “Željeznice Federacije BiH” d.o.o. Sarajevo za 2007. godinu

Izvještaj je dostavila Vlada Federacije Parlamentu Federacije radi razmatranja i prihvatanja.

Predstavnički dom je na nastavku 16. sjednice od 28.10.2008. godine razmatrao Izvještaj i Zaključkom ga prihvatio.

Izvještaj su razmatrala nadležna radna tijela i dostavila izvještaje.

U raspravi niko nije učestvovao.

Na osnovu rezultata glasanja, predsjedavajući je konstatovao da je Dom naroda, sa 34 glasa za, uz tri glasa protiv i uz tri uzdržana glasa, prihvatio Izvještaj o poslovanju JP “Željeznice Federacije BiH” d.o.o. Sarajevo za 2007. godinu.

12. Prijedlog Zakona o ugostiteljskoj djelatnosti

Prijedlog Zakona utvrdila je Vlada Federacije.

Naknadno je Vlada Federacije dostavila 24 amandmana na Prijedlog Zakona koji su postali sastavni dio Prijedloga Zakona.

Predstavnički dom je na nastavku 20. sjednice od 11.03.2009. godine usvojio Prijedlog Zakona sa 24 amandmana Vlade Federacije i šest amandmana Predstavničkog doma koje je Vlada Federacije prihvatila, pa su postali sastavni dio Prijedloga Zakona.

Prijedlog Zakona razmatrala su nadležna radna tijela i dostavila izvještaje.

Prijedlog Zakona obrazložio je Nevenko Herceg, federalni ministar okoliša i turizma.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda jednoglasno, sa 35 glasova, usvojio Prijedlog Zakona o ugostiteljskoj djelatnosti.

13. Prijedlog Zakona o turističkoj djelatnosti

Prijedlog Zakona utvrdila je Vlada Federacije.

Naknadno je Vlada Federacije dostavila šest amandmana na Prijedlog Zakona koji su postali sastavni dio Prijedloga Zakona.

Predstavnički dom je na nastavku 20. sjednice, održane 11.03.2009. godine, usvojio Prijedlog Zakona sa šest amandmana Vlade Federacije i pet amandmana Predstavničkog doma koje je Vlada Federacije prihvatila, pa su postali sastavni dio Prijedloga Zakona.

Prijedlog Zakona razmatrala su nadležna radna tijela i dostavila izvještaje.

Prijedlog Zakona obrazložio je Nevenko Herceg, federalni ministar okoliša i turizma.

U raspravi su učestvovali Besim Imamović i Nevenko Herceg, federalni ministar okoliša i turizma.

Na osnovu rezultata glasanja, predsjedavajući je konstatovao da je Dom naroda jednoglasno, sa 44 glasa, usvojio Prijedlog Zakona o turističkoj djelatnosti.

Nakon toga Dom naroda je, sa 44 glasa, usvojio sljedeći:

ZAKLJUČAK

Zadužuje se Vlada Federacije BiH da u roku od 30 dana Parlamentu Federacije BiH dostavi Zakon o turističkim zajednicama sa ciljem promoviranja turizma u Federaciji BiH.

14. Izbori i imenovanja

a) Prijedlog Odluke o izmjenama Odluke o izboru predsjednika, zamjenika predsjednika i članova radnih tijela Doma naroda Parlamenta Federacije BiH

Prijedlog Odluke utvrdila je Komisija za izbor i imenovanja Doma naroda.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda jednoglasno, sa 44 glasa, donio Odluku o izmjenama Odluke o izboru predsjednika, zamjenika predsjednika i članova radnih tijela Doma naroda Parlamenta Federacije BiH, kojom je u Zakonodavno-pravnu komisiju Doma naroda umjesto Asima Mekića, kojem je prestao mandat, imenovan **Omer Čevra**, a u Mandatno-imunitetsku komisiju imenovan je **Edin Hozan** umjesto Asima Mekića.

b) Prijedlog Odluke o izmjeni Odluke o izboru člana u Parlamentarnu komisiju odgovornu za reviziju

Prijedlog Odluke utvrdila je Komisija za izbor i imenovanja Doma naroda.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda jednoglasno, sa 44 glasa, donio Odluku o izmjeni Odluke o izboru člana u Parlamentarnu komisiju odgovornu za reviziju, kojom je umjesto Asima Mekića imenovan Edin Hozan.

Sjednica je završila rad u 11.42.

Transkript sjednice čini sastavni dio Zapisnika.

SEKRETAR

Izmir Hadžiavdić

PREDSJEDAVALAČI

Stjepan Krešić